

Naqqiut

Siunnersuut 26. februar 2016-imeersoq taarserneqarpoq
(Siunnersuutip kukkunersiorneratigut iluarsinerit, paragraffinut innersuussutitut iluarsissutit,
kukkusumik oqaasertaliussat ataasiakkaat kiisalu oqaaseqaatit
kukkunersiorneranni iluarsissutit)

**Inatsisissatut siunnersuut: Timersorneq timigissarnerlu pillugit Inatsisartut inatsisaat
nr. xx, xx. xx 2016-imeersoq**

Kapitali 1

Atuuffia nassuiaatillu

§ 1. Inatsit timersornermut tunngasunut atorneqarpoq, ataasiakkaallu peqqissuunerat, atugarissaarnerat aamma timikkut, tarnikkut inuuniarnikkullu ineriartorerisa unammillersinnaanerisalu nukittorsarneqarnissaat siunertaralugu timersornermik siuarsaassaaq, tassunga ilanngullugu unammilluni timersornermik timigissarnermillu siuarsaassaaq.

§ 2. Inatsimmi matumani timersorneq tassaavoq timigissarniarluni aamma peqqissarniarluni timi atorlugu sammisaqarneq.

Imm. 2. Inatsimmi matumani timigissarneq tassaavoq kaloriat timimi uunneqartillugit imaluunniit inuit ataasiakkaat timikkut atugarissaarnerat peqqinnerallu nukittorsarniarlugu timi atorlugu sammisaqarnerit.

Imm. 3. Inatsimmi matumani sunngiffimmi peqqissarneq tassaavoq tarnikkut, sianissutsikkut timikkullu sammisaqartarneq pilerseqqinniarlugu.

Imm. 4. Inatsimmi matumani unammilluni timersorneq tassaavoq timersornerup ilaa, aalajangersimasunik maleruagassaqarluni ingerlanneqartartoq, taakkunanilu unamineq.

Kapitali 2

Ernumangitsumik, isumannaatsumik minguitsumillu timersorneq timigissarnerlu

§ 3. Timersornermi kattuffiit, timersoqatigiiffiit aamma timersortartut klubbiisa kiisalu timigissartarfiit allallu ingerlataqarfiit timersornermik imaluunniit timigissarnermik sammisaqarnissamik neqerooruteqartartut imaluunniit taakkununga eqqaanartunik sammisaqartitsisut timersornerup timigissarnerullu ernumangitsumik isumannaatsumillu toqqammaveqarluni ingerlanneqarnera isumagissavaat.

Imm. 2. Ernumanangitsumik isumannaatsumillu toqqammaveqarluni timersornermi timigissarnermilu tunngavigineqarpoq ilaatigut imm. 1-imi taaneqartut kattuffiit suliffeqarfiillu:

1) meeqqanik pinerliisimanginnermik uppersaammik pissarsinissamut pisussaaffik pillugu Inatsisartut inatsisaat naapertorlugu meeqqanik pinerliisimanginnermik

uppernarsatinik piunasaqaateqartussaataaneq pillugu maleruagassat malinneqarnissaat taakkulu pillugit ilisimatitsinissaat,

2) eqaarsaarutit periutsillu isumannaatsut atornerqarnerisigut atortut naammaginatut atorlugit timersornerup timigissarnerullu ingerlanneqarnera qulakkiissavaat, aamma

3) timersortoq timigissartorlu ajoqusersimasoq pisariaqartumik ikiorserneqarnissaa aamma katsorsartinnissaa sungiusarteqqinnissaalu siunertaralugu tapersorneqarnissaa qulakkiissavaat.

Imm. 3. Timersorneq timigissarnerlu pillugit toqqammaviit ernumanangitsut isumannaatsullu pillugit maleruagassanik Naalakkersuisut aalajangersaasinnaapput.

§ 4. Timersornermi kattuffiit, timersoqatigiiffiit aamma timersortartut klubbiisa kiisalu timigissartarfiit allallu ingerlataqarfiit timersornermik imaluunniit timigissarnermik sammisaqarnissamik neqerooruteqartartut imaluunniit taakkununga eqqaanartunik sammisaqartitsisut timersornerup timigissarnerullu atortussiat inerteqqutaasut atornagit aamma periutsit inerteqqutaasut atornagit ingerlannissaa aamma nakorsaatnik pissassaatitut atornerqartartunik atuinnginnissaq pillugu maleruagassat Nakorsaatit Pissassaatitut Atorneqartarnerinut Kalaallit Nunaanni Akiuisunit aalajangersarneqartut malinneqarnissaat atortinneqarnissaallu isumagissuaat.

§ 5. Timersornermi kattuffiit, timersoqatigiiffiit aamma timersortartut klubbiisa timersortut imaluunniit timersortunik ikorfartuisut timersorluni unamminernik allanngortiteriniarnerni peqataannginnissaat isumagissuaat.

Imm. 2. Timersornermi unamminernik allanngortiteriniarnerup pitsaaliornissaa akiuiniarnerlu pillugit maleruagassanik Naalakkersuisut aalajangersaasinnaapput, tassunga ilanngullugit timersorluni unamminernik allanngortiteriniarnerup pitsaaliornissaa akiuiniarnerlu pillugit ataqatigiissaarinnermut allattoqarfiup inissinneqarnera pillugu.

§ 6. Qaffasissumik timersorluni unamminermut atatillugu akiliilluni peqquserlutsitsinissaq imaluunniit akilerneqarluni peqquserluuteqarnissaq inerteqqutaavoq. Qaffasissumik timersorneq tassaavoq nuna tamakkerlugu, Kalaallit Nunaanni pissartanngorniulluni, nunani tamalaani pissartanngorniulluni unamminerit aamma timersortartut immikut piginnaanillit nunani tamalaani unamminerat.

Imm. 2. Inatsimmi matumani akiliilluni peqquserlunneq tassaavoq pissuseq piaaraluni akuerisaanngitsumik

1) imm. 1-mi taaneqartunut timersorluni unamminermut atatillugu peqataasumut imaluunniit suliaqarluni isumaginnittumut tunissuteqarneq, tunissuteqarnissamut neriorsuineq neqerooruteqarnerluunniit imaluunniit timersorluni unamminermut sunniuteqarsinnaasumik pineqartup iliuuseqarnissaanut imaluunniit pinngitsoortinnissaanut allamut iluaqusiiniarneq, imaluunniit

2) imm. 1-mi taaneqartunut timersorluni unamminermut atatillugu peqataasumut imaluunniit suliaqarluni isumaginnittumut tunissummik tigusaqarneq, piunasaqarneq imaluunniit timersorluni unamminermut sunniuteqarsinnaasumik allamut iluaqutaasumik iliuuseqarneq

imaluunniit pinngitsoortitsineq.

Kapitali 3

Pisortani oqartussat akisussaaffinik suliassanillu agguaaneq

§ 7. Naalackersuisut aamma kommunalbestyrelsi timersornermi kattuffiit suleqatigalugit inuiaqatigiinni immikkoortuni tamani timersornerup timigissarnerullu tapersorsorneqarnera qulakkiissavaat, tassunga ilanngullugit suli atualinngitsuni aamma atuarfinni, ilinniarfeqarfinni, sunngiffimmi neqeroorutini, suliffeqarfimmi aamma peqqinnissaqarfimmi inunnillu isumaginnittoqarfinni.

§ 8. Naalackersuisut aamma kommunalbestyrelsi timersornermi kattuffiit suleqatigalugit timersorneq timigissarnerlu nunami tamarmi kikkunnut tamanut ammanera qulakkiissaavaat, tassunga ilanngullugit immikkut pisariaqartitsisunut siunnerfeqartumik suliniutit tapersorsornerisigut aamma peqataanissamut aningaasaqarnikkut aporfiusut annikillisinneqarnissaannut suliniuteqarnikkut.

Imm. 2. Uku immikkut isiginiarneqarlutillu salliutinneqassapput:

- 1) Meeqqat inuusuttullu.
- 2) Utoqqaat.
- 3) Inuit timimikkut susinnaanermikkut akornuteqartut.
- 4) Inuit immikkut atugarliortut.

Imm. 3. Timersornerup timigissarnerullu tamanut ammasuunera pillugu maleruagassanik Naalackersuisut aalajangersaasinnaapput, tassunga ilanngullugit immikkut pisariaaqartitsisunut siunnerfeqartunik immikkut suliniutit pillugit aamma aningaasaqarnikkut aporfiusut annikillisinneqarnissaannut suliniuteqarnerit pillugit.

§ 9. Naalackersuisut aamma kommunalbestyrelsi timersornermi kattuffiit suleqatigalugit timersornermut timigissarnermullu tunngasuni kajumissuseqarluni suliaqarnermut kajumissaaralutillu toqqammavinnut pitsaasunik pilersitsillutillu tapersersuissapput.

Imm. 2. Kajumissuseqarluni suliaqarneq pillugu maleruagassanik Naalackersuisut aalajangersaasinnaapput, tassunga ilanngullugu kajumissusillit pillugit nalunaarsuiffimmik pilersitsineq pillugu.

§ 10. Timersornikkut timigissarnikkullu neqeroorutit assigiinngisitaartut innuttaasunit tamanit atorneqarsinnaaneritut, neqeroorutigineqarsinnaaneritut ingerlanneqarsinnaanerinullu Naalackersuisut pingaarnertigut akisussaapput.

Imm. 2. Timersornerup timigissarnerullu ernumanngitsuunera isumannaatsuuneralu pillugit maleruagassat, tak. § 3, aamma timersornerup timigissarnerullu minguitsuuneri pillugit maleruagassat, tak. §§ 4-5, eqqortinneqarnissaat pillugu Naalackersuisut aamma akisussaapput.

§ 11. Kalaallit Nunaanni Timersoqatigiit Kattuffiata suliaqarneranut aningaasanut inatsimmi ukiumoortumik tapiissuteqarnikkut Naalakkersuisut aningaasaliissuteqarput.

Imm. 2. Tapiissutit allaffissornermi aningaasartuutitut, sulisut, aqutsisut sungiusaasullu ilinniartitaanerannut, immikkut kattuffinnut peqatigiiffinnullu ilaasortaasunut ingerlatitseqqinnermut nunani tamalaani unammiaaarnerni aamma nunani tamalaani timersornikkut suleqatigiinnermi peqataanermut tunngaviusumik tapiissutaapput.

Imm. 3. Tapiissutit ilai siunertanut aalajangersimasunut atorpeqartussatut aalajangerneqarsinnaapput.

Imm. 4. Tapiissutit piumasaqaatinik erseqqinnerusumik aalajangersarneqartunik atugassaqaartitsinnaapput.

Imm. 5. Naalakkersuisut Kalaallit Nunaanni Timersoqatigiit Kattuffiannik angusaqarnissamut ukiunut sisamanut isumaqatigiissuteqassapput, tassani peqataasut sammisassanut, tassunga ilanngullugu angusassatut piumasaqaatinut, nalunaarusiornissamut naatsorsuusiornissamullu piumasaqaatinut naatsorsuutigisaat aalajangersarneqassapput. Isumaqatigiissut tunngaviusumik pissutsinut atuuttunut tunngatillugu ukiukkaartumik aaqinneqartassaaq, tassunga ilanngullugit aningaasaliissutit, aamma pisariaqartitsinerit nutaat.

§ 12. Naalakkersuisut Elite Sport Greenlandip ingerlataqarnerannut aningaasanut inatsimmi ukiumoortumik tapiissutinik aningaasaliisarput.

Imm. 2. Tapiissutit allaffissornikkut aningaasartuutit akilerneqarnerinut aamma Elite Sport Greenlandip suliaqarnerani aningaasartuutit akilerneqarnerinut tunngaviusumik tapiissutitut tunniunneqartarput, tak. § 20.

Imm. 3. Tapiissutit ilai siunertanut aalajangersimasunut atorpeqartussatut aalajangerneqarsinnaapput.

Imm. 4. Piumasaqaatit erseqqinnerusumik aalajangersarneqartut naammassineqarpata tapiissutit tunniunneqassapput.

Imm. 5. Naalakkersuisut Elite Sport Greenlandimik angusaqarnissamut ukiunut sisamanut isumaqatigiissuteqassapput, tassani peqataasut sammisassanut, tassunga ilanngullugu angusassatut piumasaqaatinut, nalunaarusiornissamut naatsorsuusiornissamullu piumasaqaatinut naatsorsuutigisaat aalajangersarneqassapput. Isumaqatigiissut tunngaviusumik pissutsinut atuuttunut tunngatillugu ukiukkaartumik aaqinneqartassaaq, tassunga ilanngullugit aningaasaliissutit, aamma pisariaqartitsinerit nutaat.

§ 13. Kalaallit Nunaanni Timersoqatigiit Kattuffiannut aamma Elite Sport Greenlandimut Naalakkersuisut tapiissuteqarneranni piumasarineqarpoq nakorsaaitit pissassaaititut atorpeqartartut pitsaaliornissaat akiuinerlu pillugu Nakorsaaitit Pissassaaititut Atorpeqartarnerinut Kalaallit Nunaanni Akiuisut maleruagassaannik aalajangersagaanik taakku malinnissasut eqqortitsissasullu, tak. § 21, imm. 2, nr. 5. Maleruagassanik taakkuninnga peqqarniitsumik utikattumillu unioqqutitsisarneq tapiissutinik pissarsisinnaanerup atorunnaarsinneranik aamma tapiissutit tunniunneqareersimasut utertillugit akilerneqarnissaannik piumasaqarnermik kinguneqassaaq.

Imm. 2. Kalaallit Nunaanni Timersoqatigiit Kattuffiannut aamma Elite Sport Greenlandimut Naalakkersuisut tapiissuteqarneranni piumasarineqarpoq timersorluni unamminernik allanngortiteriniarnerup pitsaaliornissaa akiuiniarnerlu pillugit Naalakkersuisut maleruagassiaannik malinnissasut, tak. § 5, imm. 2. Maleruagassanik taakkuninnga peqqarniitsumik utikattumillu unioqqutitsisarneq tapiissutinik pissarsisinnaanerup atorunnaarsinneranik aamma tapiissutit tunniunneqareersimasut utertillugit akilerneqarnissaannik piumasaqarnermik kinguneqassaaq.

§ 14. Timersortarfinnik sanaartornermut, iluarsaassinermut aaqqissuussinermullu Naalakkersuisut tapiissuteqarsinnaapput.

Imm. 2. Imm. 1 naapertorlugu timersortarfinnut aaqqissuussinernullu tapiissutit annerusumik nuna tamakkerlugu nunallu immikkoortuini timersortarfinnut tutsinneqassapput.

§ 15. Kommunimi timersornermut timigissarnermullu assigiinngitsunik neqerooruteqarnermut kommunalbestyrelsi pingaarnertigut akisussaavoq tamatumunngalu anguniakkanik tunngavinnillu aalajangersaassalluni.

Imm. 2. Kommunip illoqarfiini nunaqarfiinilu timersornikkut timigissarnikkullu neqerooruteqarnissamut kommunalbestyrelsi ukiut tamaasa pilersaarusiussaaq. Pilersaarut kommunip nittartagaatigut tamanut saqqummiunneqassaaq.

Imm. 3. Naalakkersuisut tamanna pillugu kommunalbestyrelsimik isumasioqateqareerlutik pilersaarutip imm. 2-mi taaneqartup ilusaa imarisaalu pillugit maleruagassanik aalajangersaasinnaapput.

§ 16. Kommunilbestyrelsi timersortarfiit sanaartornerinut, iluarsartuunnerinut aaqqissuunnerinullu tapiissuteqarsinnaavoq.

Imm. 2. Imm. 1 naapertorlugu sanaartornerinut, iluarsartuussinernut aaqqissuussinernullu tapiissutit sumiiffinni timersortarfinnut tapiissutaanerussapput.

Imm. 3. Kommunilbestyrelsi sumiiffimmi ininut silamilu timersorfinnut, timersornermi klubbinit pigineqartunut attartorneqartunulluunniit ingerlatsinermi aningaasartuutinut tapiissuteqarsinnaavoq.

Imm. 4. Kommunilbestyrelsi sumiiffimmi timersornikkut timigissarnikkullu sammisanut tapiissuteqarsinnaavoq, tassunga ilanngullugit sumiiffimmi timersoqatigiiffinnut aamma timersornermi klubbinut tapiissutit.

Imm. 5. Naalakkersuisut tamanna pillugu kommunalbestyrelsimik isumasioqateqareerlutik tapiissutit imm. 1-4-mi taaneqartut pillugit maleruagassanik aalajangersaasinnaapput.

§ 17. Timersortarfiit sanaartornerinut, iluarsaannerinut aaqqissuunnerinullu imaluunniit ininik silamilu timersortarfinnik, timersoqatigiiffinnit pigineqartunik attartorneqartunilluunniit ingerlatsinermi aningaasartuutinut kommunalbestyrelsi allaluunniit tapiissuteqarpata tapiissutigineqartut ilaannik Naalakkersuisut utertitsinnaapput.

§ 18. Kommunit agguarnerisa avataanni inatsit una malillugu suliasanik kommunalbestyrelsimut isumagisassangortinneqarsimasunik Naalakkersuisut isumaginnittuupput.

Imm. 2. Naalakkersuisut kommunimi ataatsimi arlalinniluunniit kommunalbestyrelsimik isumaqatigiissuteqarnermikkut, imm. 1 malillugu suliasat Naalakkersuisunit pisussaaffigineqartut isumagineqarnissaat tunniussinnaavaat.

Kapitali 4

Timersornermi kattuffiit

§ 19. Kalaallit Nunaanni Timersoqatigiit Kattuffiat tassaavoq Kalaallit Nunaanni timersornikkut timigissarnikkullu aaqqissugaasumik ingerlataqarnermut nuna tamakkerlugu pisortatigoortumik sinniisoq. Kattuffik pisortatigoortumik Kalaallit Nunaannut, tassunga ilanngullugu nunanut tamalaanut atatillugu sinniisuuvoq.

§ 20. Suliffeqarfik imminut pigisoq Elite Sport Greenland tassaavoq timersortartunik pikkorivissunik siuarsaanermi inerisaanermilu Kalaallit Nunaanni nuna tamakkerlugu sulisoq. Kattuffik Kalaallit Nunaanni Timersoqatigiit Kattuffiat peqatigalugu pisortatigoortumik Kalaallit Nunaannut, tassunga ilanngullugu nunanut tamalaanut atatillugu sinniisuuvoq.

Imm. 2. Elite Sport Greenland Kalaallit Nunaanni Timersoqatigiit Kattuffiat tassanilu immikkut kattuffiit, timersoqatigiiffiit aamma timigissartarfiit suleqatigalugit siunertaminik tapersersuissaaq, ilaatigut ukununga tapersersuinnermigut:

- 1) timersornermik piginnaasallit timersortartullu pikkorivissut sungiusarnerinut aamma unamminerni peqataanerinut, nunani tamalaani pikkorivissut timersornerini peqataanissamut periarfissamik siuarsaasoq,
- 2) nunani tamalaani timersornermi kingusinnerusukkut peqataanissaq siunertaralugu piginnaasalinnik inerisaaneq,
- 3) pikkorivissut pillugit sungiusaasut ilinniartitsinerillu,
- 4) Kalaallit Nunaanni timersornermi nakorsaanikkut immikkut ilisimasalinnik ineriartortitsineq, aamma
- 5) pikkorivissut soqutigisaannik isumaginninneq nunanilu tamalaani peqataanissaq siunertaralugu kalaallit nunaanni immikkut kattuffinnik aaqqissugaasumik ineriartortitsineq.

Imm. 3. Elite Sport Greenland Naalakkersuisut suleqatigalugit timersornikkut piginnaasaqartunik pikkorivissunillu tapersersuissaaq timersornikkut piginnaasaqartoq pikkorivissorlu timersornermik ingerlataqarnermi saniatigut ilinniarnissamut periarfissaqartillugu.

§ 21. Timersornermi timigissarnermilu nakorsaatit pissassaaitut atorpeqartarnerinut suliniutit siunnerfeqarnerannik, pitsaaninngortinnissaannik ataqatigiissarneqarnissaanillu siunertaqartumik ataatsimiititaliamik attaviitsumik, Nakorsaatit Pissassaaitut Atorpeqartarnerinut Kalaallit Nunaanni Akiuisunik, Naalakkersuisut pilersitsissapput, tassunga ilanngullugit pitsaaliuineq akiuinerlu.

Imm. 2. Nakorsaatit Pissassaatit Atorneqartarnerinut Kalaallit Nunaanni Akiuisut siunertaminnik malinninnerminni:

- 1) timersornermi timigissarnermilu nakorsaatit pissassaatit atorneqartarnerinik pitsaaliuinnermut akiuinnermullu tunngasunik qaammarsaanermik ineriartortitsinermillu suliaqassapput,
- 2) Nakorsaatit Pissassaatit Atorneqartarnerinut Kalaallit Nunaanni Akiuisut suliaqarfiisa iluanni suliat pillugit pisortani oqartussanut siunnersuineq ikiuinerlu,
- 3) nakorsaatit pissassaatit atorneqartarnerinik akiuineq pillugu nunani tamalaani suleqatigiinnermut peqataassapput,
- 4) atortussiat timersornermi inerteqqutaasut aamma periutsit inerteqqutaasut atorneqarneri pissarsiarineqarsinnaanerisalu killeqartinnissai siunertaralugu aaqqiissapput,
- 5) nakorsaatit pissassaatit atorneqartarnerinik akiuiniarneq pitsaaliorneq pillugit nunani tamalaani maleruagassanik aalajangersaassapput (nakorsaatit pissassaatit atorneqartarnerinik akiuiniarnermut maleruagassat),
- 6) nakorsaatit pissassaatit atorneqartarnerinik nakkutilliissapput, tak. imm. 3, aamma
- 7) timersortartut aamma timigissartartut nakorsaatinik pissassaatinik atuisarnerannik akiuiniarnermi maleruagassanik unioqquutitsisunik ikorfartuisunut imaluunniit timersornermi timigissarnermilu nakorsaatit pissassaatit atorneqarnerinut atatillugu allatigut unioqquutitsisunut aaqqiissapput, tassunga ilanngullugit pineqaatissiissutissat pillugit aalajangiissapput.

Imm. 3. Nakorsaatit pissassaatit atorneqartarnerinik akiuiniarnermik nakkutilliinermik, tassunga ilanngullugu misiliinissamut pilersaarusiorneq, misiligutissanik, laboriatoriami misissuinerinik katersineq passussinerlu, inernernik passussineq, tusarniaanernik aamma eqqartuussisunut annerusunut suliaassanngortitsinermik isumaginnittunik nakorsaatit pissassaatit atorneqartarnerinik akiuiniarnermik nakkutilliisunik iluameersumik piginnaatitaasunik piukkunnaateqartunillu suleqatigiinneq Nakorsaatit Pissassaatit Atorneqartarnerinut Kalaallit Nunaanni Akiuisut pilersitsissapput, taamaattorli tak. imm. 4.

Imm. 4. Imm. 3-mi taaneqartunut nakorsaatit pissassaatit atorneqartarnerinik akiuiniarnermik nakkutilliisunut periarfissatut allatut imaluunniit tapertaasussatut nakorsaatit pissassaatit atorneqartarnerinik akiuiniarnermik nakkutilliinerup tamakkiisumik ilaannakuusumilluunniit isumaginissaa pillugu nunanit allaneersunik nakorsaatit pissassaatit atorneqartarnerinik akiuiniartunik suleqateqarnissamik Nakorsaatit Pissassaatit Atorneqartarnerinut Kalaallit Nunaanni Akiuisut isumaqatigiissuteqarsinnaapput.

§ 22. Nakorsaatit Pissassaatit Atorneqartarnerinut Kalaallit Nunaanni Akiuisut tallimanik ilaasortaatitaqarput. Ilaasortat imatut agguarneqarnissaannik inassuteqaat malillugu Naalakkersuisunit toqqagaapput:

- 1) ilaasortat marluk nalinginnaasumik timigissarneq pillugu ilisimasaqartut Kalaallit Nunaanni Timersoqatigiit Kattuffiannit inassutigineqartut.
- 2) ilaasortat marluk timersortut pikkorivissut pillugit ilisimasaqartut Elite Sport Greenlandimit inassutigineqartut.

3) ilaasortaq ataaseq timersornermi nakorsaasersornermik pissutsinik ilisimasaqartoq Nunatsinni Nakorsaaneqarfimmit inassutigineqartoq.

Imm. 2. Ataatsimiititaliami ilaasortat, Kalaallit Nunaanni Timersoqatigiit Kattuffiannit aamma Elite Sport Greenlandimit inassutigineqartut Kalaallit Nunaanni Timersoqatigiit Kattuffianni aamma Elite Sport Greenlandimi siulersuisunut ilaasortaassanngillat. Ilaasortat aamma kattuffiit taakku arlaanni atorfeqartuussanngillat.

Imm. 3. Ataatsimiititaliami ilaasortat piffissamut ukiunut sisamanut toqqarneqassapput. Ataasiaannarluni toqqaqqittoqarsinnaavoq. Ataatsimiititaliami piffissap suliffiusut naanissaa sioqqullugu ilaasortaq ataaseq tunuarpat piffissamut sinneruttumut toqqaasoqassaaq.

Imm. 4. Ataatsimiititaliaq nammineq siulittaasussamik aamma siulittaasup tullissaanik inissitissaq aamma suleriaasissani nammineq aalajangersassallugu. Suleriaatsimi takuneqarsinnaassaaq taasinerit naligiinnerini siulittaasup taasineri aalajangiisuussasoq.

Imm. 5. Kalaallit Nunaanni Timersoqatigiit Kattuffiat ataatsimiititaliamit atorneqarsinnaasumik allattoqarnikkut ikiuissaaq.

§ 23. Kalaallit Nunaanni Timersoqatigiit Kattuffianut ilaasut immikkut kattuffiit, timersoqatigiiffiit, timersornermi klubbit aamma timigissartarfiit avatanni timersornermi timigissarnermilu nakorsaatinik pissassaatinut atuinerup pinngitsoortinnissaanik siunertaqarluni Nakorsaatit Pissassaatinut Atorneqartarnerinut Kalaallit Nunaanni Akiuisut nakorsaatit pissassaatinut atorneqarnerinik pitsaaliornissaa akiuinissarlu pillugit ukuninnga suleqateqarnissamik isumaqatigiissuteqassaaq:

1) timigissartarfinnik ingerlataqarfinnillu allanik timersornikkut imaluunniit timigissarnikkut sammisaqartitsinermik neqerooruteqartut imaluunniit taakkununga eqqaanartunik sammisaqartitsisut aamma Kalaallit Nunaanni Timersoqatigiit Kattuffiannut ilaanngitsut, aamma

2) Kalaallit Nunaanni Timersoqatigiit Kattuffianut ilaasut immikkut kattuffiit, timersoqatigiiffiit, timersornermi klubbit aamma timigissartarfiit avataanni timersornermi timigissarnermilu ingerlataqartut kattuffii.

Imm. 2. Timigissartarfiit il.il. Kalaallit Nunaanni Timersoqatigiit Kattuffianut ilaasut immikkut kattuffinnut, timersoqatigiiffinnut, timersornermi klubbinut aamma timigissartarfinnut atuuttut maleruagassat naapertorlugit nakorsaatit pissassaatinut atorneqartarnerinik akiuiniarluni nakkutilliinissaat imm. 1-mi taaneqartut suleqatigiinnissamut isumaqatigiissutit qulakkiissavaat.

Imm. 3. Suleqatigiinnissamut isumaqatigiissutit matumani pineqartut naapertorlugit suliaqarnermut Nakorsaatit Pissassaatinut Atorneqartarnerinut Kalaallit Nunaanni Akiuisut suleqateqarnissamik isumaqatigiissutit imm. 1-imi pineqartut akileeqqusinnaavaat.

Imm. 4. Imm. 1-mi taaneqartut suleqatigiinnissamut isumaqatigiissutit ilusilersornissaannut maleruagassanik Naalakkersuisut aalajangersaasinnaapput.

§ 24. Timigissartarfiit allallu ingerlataqarfiit timersornermik imaluunniit timigissarluni sammisaqartitsinermik taakkununggaluunniit eqqaanartunik sammisaqartitsisut aamma Kalaallit Nunaanni Timersoqatigiit Kattuffianut ilaanngitsut Nakorsaatit Pissassaatinut

Atorneqartarnerinut Kalaallit Nunaanni Akiuisunik suleqatigiinnissamik isumaqatigiissuteqarsimanerlutik atuisunut paasissutissiissutigissavaat, tak. § 23. Taamaaqataanik Kalaallit Nunaanni Timersoqatigiit Kattuffianut ilaasut immikkut kattuffiit, timersoqatigiiffiit, timersornermi klubbit aamma timigissartarfiit avataanni timersornermi timigissarnermilu ingerlataqartut kattuffiinut atuuppoq.

Imm. 2. Paasissutissiineq allagarsiinikkut pissaaq, timigissartarfiup imaluunniit suliffeqarfiup isaariaani imatut ikkunneqartussaq, sullitanit takuneqarsinnaalluni. Timigissartarfik imaluunniit suliffeqarfik nittartagaqarpat Nakorsaait Pissassaaitut Atorneqartarnerinut Kalaallit Nunaanni Akiuisunik suleqatigiinnissamik isumaqatigiissut aamma tassani allanneqarsimassaaq.

Imm. 3. Paasissutissiinerup ilusilersorneqarnissaanut piumasqaatinik erseqqinnerusunik Nakorsaait Pissassaaitut Atorneqartarnerinut Kalaallit Nunaanni Akiuisut aalajangersaasinnaapput.

§ 25. Inuit nakorsaatinik pissassaaitut atuisimasut pineqaatissinneqarsimasut pillugit paasissutissanik imaqtartumik elektronikkikkut nalunaarsuiffimmik Nakorsaait Pissassaaitut Atorneqartarnerinut Kalaallit Nunaanni Akiuisut ingerlataqassapput.

Imm. 2. Nakorsaait Pissassaaitut Atorneqartarnerinut Kalaallit Nunaanni Akiuisut nalunaarsuiffik aqutugalugu inuit kikkut nakorsaatinik pissassaaitut atorneqartartunik atuisuusimasut pineqaatissinneqarsimasut pillugit paasissutissanik Kalaallit Nunaanni Timersoqatigiit Kattuffiannut aamma kattuffimmut atasunut immikkut kattuffinnut timersoqatigiiffinnullu, Elite Sport Greenlandimut aamma peqataasunut nakorsaait pissassaaitut atorneqartarnerinik pitsaaliuinissaq akiornissarlu pillugu Nakorsaait Pissassaaitut Atorneqartarnerinut Kalaallit Nunaanni Akiuisunik suleqatigiinnissamut § 23 naapertorlugu isumaqatigiissuteqartunut paasissutissanik pisariaqartinneqartunik ingerlatitseqqissinnaavoq. Paasissutissat taamaallaat nakorsaatinik pissassaaitut atorneqartartunik atuisimasut pineqaatissinneqarnerup atorunnaarnissaa pillugu ulloq pillugu paasissutissaapput ingerlateqqinneqarsinnaasut. Paasissutissat nakorsaatinik pissassaaitut atorneqartartunik atuisimasut pineqaatissinneqartup atortinneqarneranut taamaallaat atorneqassapput.

Imm. 3. Peqataasut, nalunaarsukkat aqutugalugit imm. 2-mi taaneqartunut paasissutissanut isersinnaasut paasissutissat pineqartut eqqarsaatigalugit nipangiussisussaaitaapput.

Imm. 4. Nalunaarsuiffimmik ingerlatsineq, tassungalu nalunaaruteqartarneq pillugu aamma taassuma aserfallatsaaliorneqarnissaa pillugu maleruagassanik erseqqinnerusunik Naalakkersuisut aalajangersaassapput.

§ 26. Nakorsaait pissassaaitut atorneqartarnerinik akiuiniarnermi maleruagassanik unioqquitsinermut tunngasunik Nakorsaait Pissassaaitut Atorneqartarnerinut Kalaallit Nunaanni Akiuisut aalajangiinerinut naammagittaalliuutinik suliarinnittussamik naammagittaalliorfimmik, ”Kalaallit Nunaanni Nakorsaait Pissassaaitut Atorneqartarnerinut Akiuiniarnermut Ataatsimiititaliamik” Naalakkersuisut pilersitsissapput.

Imm. 2. Kalaallit Nunaanni Nakorsaaitit Pissassaaitit Atorneqartarnerinut Akiuiniarnermut Ataatsimiititaliaq pingasunik ilaasortaaitaqaarpoq. Ilaasortat imatut agguarneqarnissaannik inassuteqaat malillugu Naalakkersuisunit toqqaagaapput:

1) ilaasortaq ataaseq inatsisilerinermik ilinniagalittut soraarummeersimasoq, Nunatta Eqqartuussisuanit inassutigineqartoq.

2) ilaasortaq ataaseq timersornermi nakorsaatinut tunngasunik ilisimasaqartoq, Nunatsinni Nakorsaaneqarfimmit inassutigineqartoq.

3) ilaasortaq ataaseq timersorneq pillugu ilisimasaqartoq, Kalaallit Nunaanni Timersoqatigiit Kattuffiannit aamma Elite Sport Greenlandimit peqatigiillutik inassutigineqartoq.

Imm. 3. Ataatsimiititaliami ilaasortat, Kalaallit Nunaanni Timersoqatigiit Kattuffiannit aamma Elite Sport Greenlandimit inassutigineqartut Kalaallit Nunaanni Timersoqatigiit Kattuffianni aamma Elite Sport Greenlandimi siulersuisunut ilaasortaassanngillat. Ilaasortat aamma kattuffiit taakku arlaanni atorfeqartuussanngillat.

Imm. 4. Ataatsimiititaliami ilaasortat piffissamut ukiunut sisamanut toqqarneqassapput. Ataasiaannarluni toqqaaqittoqarsinnaavoq. Ataatsimiititaliami piffissap suliffiusut naanissaa sioqqullugu ilaasortaq ataaseq tunuarpat piffissamut sinneruttumut toqqaasoqassaaq.

Imm. 5. Ilaasortaq Nunatta Eqqartuussisuanit inassuteqartoqarneranit toqqarneqartoq ataatsimiititaliami siulittaasuusaaq.

Imm. 6. Ataatsimiititaliaq nammineq suleriaasissamik aalajangersaassaaq. Suleriaasissamili takuneqarsinnaassaaq taasinerit naligiinnerini siulittaasup taasineri aalajangiisuusasoq.

Imm. 7. Naalakkersuisut ataatsimiititaliamit atorneqarsinnaasumik allattoqarnikkut ikiuissapput.

Kapitali 5

Aningaasalersuineq allaffissornerlu

§ 27. Timersornermut timigissarnermullu aningaasartuutit tamarmik kommunimit akilerneqassapput, aningaasartuutit tamakkiisumik ilaannakuusumilluunniit Namminersorlutik Oqartussanit allaniilluunniit akilerneqartussaasut pillugit erseqqissumik inatsisitigut tunngavissaqanngippat. Namminersorlutik Oqartussat aamma kommunit inatsisitigut pisussaaffiusup suliassat akilerneqarlutik isumagineqarnissaat pillugu isumaqatigiissuteqassapput.

Imm. 2. Kommunit agguarnerisa avataanni immikkoortuni aningaasartuutit, tak. imm. 1, Naalakkersuisunit akilerneqassapput.

Kapitali 6

Naatsorsuutit kukkunerisuinerlu

§ 28. Kalaallit Nunaanni Timersoqatigiit Kattuffiat, Elite Sport Greenland aamma Nakorsaaitit Pissassaaitit Atorneqartarnerinut Kalaallit Nunaanni Akiuisut tamatumunnga piffissaliussat Naalakkersuisut aalajangersagaat nallertinnagu ukiumut qaangiuttumut

naatsorsuusiorfiusumut naatsorsuutiminnik kukkunersiorneqarsimasunik allatigullu naatsorsuutininut atortunik Naalackersuisunut nassiussissapput.

Imm. 2. Kalaallit Nunaanni Timersoqatigiit Kattuffiata nammineq naatsorsuutaanut ilanngullugit immikkut kattuffiit, timersoqatigiiffiit, timigissartarfiit il.il. kattuffimmut ilaasunut naatsorsuutit kukkunersiorneqarsimasut nassiutissavai.

Imm. 3. Naatsorsuusianik saqqummiussineq Namminersorlutik Oqartussat naatsorsuuserivia pillugu maleruagassani tamanna pillugu maleruagassat naapertorlugit pissaaq. Naatsorsuutit avataanit kukkunersiuusumit naalagaaffimmit akuerisaasumit imaluunniit nalunaarsugaasumit kukkunersiorneqassapput.

§ 29. § 28, imm. 1-imi taaneqartunmit allaanerusunit Naalackersuisunit tapiissutinik pissarsisartut allat tamatumunnga noqqaasoqarneratigut tapiissutit siunertamut aningaasaliiffigineqartumut atorneqarsimanageri pillugit uppersaassapput.

§ 30. Tapiissutisisimasoq eqqunngitsunik paasissutissiisimappat, tapiissutisinissamut piumasaqaatit naammassineqanngippata imaluunniit tapiissutit aningaasaliissutigineqartussanut siunertanut allanut atorneqarsimappata tapiissutit aningaasaliissutigineqarsimasut tamakkiisumik ilaannakuusumilluunniit utertillugit akilerneqarnissaat piumasarineqarsinnaavoq.

§ 31. Tapiissutit atorneqarsimanagerinut akuersineq aamma uppersaatit pillugit, naatsorsuutit kukkunersiuinerlu pillugit aamma tapiissutit utertillugit akilerneqarnissaat pillugu maleruagassanik Naalackersuisut aalajangersaasinnaapput.

Kapitali 7

Naammagittaalliuuteqarneq

§ 32. Inatsisit una naapertorlugu Naalackersuisut aamma kommunalbestyrelsip aalajangiineri allaffissornikkut oqartussanut allanut suliassanngortinneqarsinnaanngillat.

Imm. 2. Naalackersuisut isumaqatigiissuteqarfigalugit kommunalbestyrelsinut tunniunneqarsimasunut suliassanut tunngasuni kommunalbestyrelsimit aalajangiinerit aalajangiinerup nalunaarutigineqarneraniit sapaatit akunneri sisamat qaangiutsinnagit Naalackersuisunut suliassanngortinneqarsinnaapput.

Kapitali 8

Misileraalluni aaqqissuussinerit

§ 33. Inatsisip iluani misileraalluni ingerlataqarnermik siuarsaanissamut tamanna pisariaqartutut isigineqarsinnaappat utaqqiisaasumik aaqqissuussinertut immikkut pisoqartillugu Naalackersuisut inatsimmi aalajangersakkanik saneqqussisinnaapput.

Imm. 2. Misileraalluni ingerlataqarnermut Naalackersuisut tapiissuteqarsinnaapput, tak. imm. 1.

Kapitali 9

Nakkutillineq pineqaatissiinerlu

§ 34. Inatsisip eqqortinneqarneranik pingaarnertigut Naalakkersuisut nakkutilliisuupput.

Imm. 2. Inatsit malillugu suliasamisut isigineqarsinnaasutut pisariaqartunik paasissutissanik Naalakkersuisut piumasaqarsinnaapput.

§ 35. § 6, imm. 1, § 24, imm. 1-imik aamma 2-mik aamma § 25, imm. 3-mik unioqqutitsinernut akiliisitsisoqarsinnaavoq.

Imm. 2. § 6, imm. 1-imik unioqqutitsinermut Kalaallit Nunaanni pinerluttulerinermut inatsimmi maleruagassat malillugit allanik pineqaatissiilluni pillaaasoqarsinnaavoq, pisoq immikkut ingassattumik pissuseqarpat, pingaartumik ingerlanneqarsimanera pissutigalugu, imaluunniit suliaq arlallit peqatigiinnerisigut ingerlanneqarsimappat, imaluunniit pineqartup tunissutip imaluunniit iluaqusiinerup annertussusiata malitsigisaanik.

Imm. 3. Inatsit imaluunniit inatsit naapertorlugu najoqqutassaliat akiliisitsinissamut tunngavissaqartitsippata Kalaallit Nunaanni pinerluttulerinermi inatsimmi maleruagassat malillugit inatsisitigut pisinnaatitaasoq pisussaatitaasorlu akiliisinneqarsinnaavoq.

Imm. 4. Inatsit manna naapertorlugu najoqqutassaliani najoqqutassanik unioqqutitsinerit pillugit akiliisitsisoqarluni pineqaatissiinernik aalajangersaasoqarsinnaavoq.

Imm. 5. Pillaammik akiliutit, inatsit manna imaluunniit peqqussutit inatsit naapertorlugu aalajangersarneqartut malillugit pineqaatissiissutigineqartut, Nunap Karsianut tutsinneqartassapput.

Kapitali 10

Atuutilersitsineq

§ 36. Inatsit ulloq 1. januar 2017 atuutsilissaaq.

Imm. 2. Inatsisip atulersinneqarnerata peqatigisaanik timersorneq timigissarnerlu eqqarsaatigalugu kulturikkut ingerlatsineq sunngiffimmilu sammisassaqaartitsineq pillugit Inatsisartut peqqussutaata nr. 10-p, 21. maj 2002-meersumi maleruagassat atorunnaarput.

Imm. 3. Kulturikkut ingerlatsineq sunngiffimmilu sammisassaqaartitsineq pillugit Inatsisartut peqqussutaata nr. 10-p, 21. maj 2002-meersumi naapertorlugu maleruagassat aalajangersarneqarsimasut imaluunniit ingerlatiinnarneqartut atuutiinnassapput, taakku

atorunnaarsinneqarnissaasa imaluunniit inatsit manna imaluunniit inatsisit allat naapertorlugit
maleruagassanik aalajangersarneqartunik taarserneqarnissaasa tungaannut.

Namminersorlutik Oqartussat, den xx.xx 2016

Kim Kielsen